

EDITORIAL

Ipasulong an interes han katawhan ha butnga han burukrata kapitalista nga ribalay

Tigaman han bag-o nga balitang han pagpintas han sumpakiay han magkakaribal nga paksyon han naghahadi nga klase han mga burukrata kapitalista an susrunod ngan magkasurumpay nga panhitabo hini nga naglabay nga semana: an *impeachment* o pagsang-at han kaso han Kongreso kontra kan Vice President Sara Duterte ngan pagtitikang han pagbista ha Senado, an kudeta ha Senado kadungan han paglutaw ni Sen. Bato dela Rosa, ngan utro niya nga pagkawara agud lumikay ha mandamyento de aresto han International Criminal Court (ICC).

Baga mga payaso ngan sirkeron an mga pulitiko nga nagtarutambing ngan nagpabarubaliko ha nahitabo nga mga maniobra, kontra-maniobra ngan banggaay. Kahuman han unom kabulan nga pagtinago, tigda nga nagpakita hi Sen Bato dela Rosa agud makabug-os han bag-o nga mayoriya ngan magbutang han bag-o nga pamunuan. Kundi atubangan han hulga nga arestuhon ngan dad-on hiya ha The Hague, kahuman igsapubliko an mandamyento nga igin-gawas han ICC kontra ha iya, dagmit hiya nga utro nga nagtago ha kun diin nga taguan.

An pagbabag-o han liderato ha Senado gintutuohan nga kaparte han plano nga idiskaril an pagbista kan Sara Duterte. Ginkasuhan an bise presidente ha pagmalgastar ha ₱500 kamilyon nga "confidential funds," ha diri mahieksplikar nga pagdako han iya personal nga karikuhan ngan iba pa nga kaso. Dako nga mayoriya (257 nga botos) han Kong-

reso an pinabor ha kaso nga *impeachment*, ikaduha nga beses ha sakob han masobra la usa katuig. Diri sugad han una, layon yana nga ginbug-os han Senado an korte nga magbibista kan Duterte, bisan kun waray pa kaklaruhan kun diin ini maabot.

Piho nga magpapadayon pa ha mga masunod nga semana an presente nga takna hini nga sumpakiay han mga nagriribalay nga paksyon, ngan piho nga mapintas ngan tikadto ha bag-o nga mga banggaay ha tidaraon samtang tik-

kahirani an eleksyon 2028. Pursigido an pagduso han kampo ni Marcos ngan magkalain-lain nga partido nga mapatalsik hi Sara Duterte tikang ha pwesto ngan maulang an iya pagdalagan komo presidente.

Ini nga sumpakiay han mga Marcos ngan Duterte espiho han mapintas ngan uruunina madarahug nga sumpakiay han mga nagriribalay nga paksyon han mga naghahadi nga klase—mga burukrata kapitalista nga nag-uunahay ha pagpariko ha poder. Tikapaso ini nga sumpakiay atubangan han tikagrabe nga padarusdos han ekonomiya ngan sistema nga bagakolonyal ngan bagapyudal.

Mas natikaguti an ganansya ha poder nga poyde kalmado nga pagbahinon ngan magsaro an mga burukrata kapitalista, hinungdan nga nahingangadto ha pag-aagaway ngan banggaay an ira kahakugan para ha karikuhan ngan poder. Oras nga makalingkod ha poder, naglalamangan hira ha kadagmiton ngan kadakuon han ginkukurakot ha pondo han katawhan, samtang nag-iisan-isayanay ha pagmamakamalimpyo ha atubangan han katawhan. Mas nagigin butaray ngan tinagdako an korapsyon ngan pandambong han mga burukrata kapitalista.

Samtang napatakas ha karikuhan ngan nag-aagaway ha poder an mga burukrata kapitalista, ludlod naman



an hiluag nga masa han katawhan ha kakurian ngan ha matag-adlaw nga pagtrabaho agud mabuhi. Ha naglabay nga duha kabulan, dinugang ha pas-anon han katawhan an dirudiretso nga paghitaas han presyo han pagkaon ngan mga batakan nga panginahanglan ngan sukot ha mga batakan nga serbisyo. Kasunod ini han pangegerra han US ha Iran nga ginsisingabot han mga hakog nga kompaniya ha lana para pahitas-on an presyo han *diesel* ngan gasolina ngan iba pa nga produkto nga petrolyo (50-100% nga mas hitaas tanding ha pira nga nasud ha Southeast Asia). Ginlalaman nga dirudiretso pa nga mahitaas an presyo ha mga maabot nga bulan.

Ha butnga han kakablasan ngan kagutom han katawhan, dugang nga nasusunghan an ira kangalas ha rehimen US-Marcos ngan mga burukrata kapitalista nga waray na ngani ginhihimo para ibanan an ira kakurian, nadugang pa ha ira pas-anon. Kahuman makigkunsabuhay ha mga kompaniya han lana ha pagpapakuri ha katawhan, makangaralas an rehimen Marcos nga ginhihimo nga paraglimos an katawhan nga ginpapapila ha parayaw nga panhahatag han ayuda ngan bugas, nga sadang la para ha pira kaadlaw.

Dugang nga nangangalas an ka-

tawhan Pilipino ha rehimen US-Marcos ngan ha mga naghahadi nga klase atubangan han kawaray baratunon han mga kurakot nga nagburusa han bilyun-bilyon kapiso ha mga peke ngan palpak nga *flood control* nga proyekto nga nabuksas tikang hadton nakalabay nga tuig, hasta na ha iba nga dagko nga korapsyon ha gubyrno. Samtang gintatamas-tamasan an katungod ngan kaupayan han katawhan Pilipino, sunud-sunuran hi Marcos ha mga dikta han amo nga imperyalista nga US, ha plano nga pag-aabre han 1,620-kaektarya nga "economic security zone" ha Pampanga ngan Tarlac para ha eksklusibo nga gamit han mga kompaniya nga Amerikano.

Nadugang pa ha ira kangalas an padayon nga pagsasabrag han rehimen Marcos han kamadarahug kontra ha katawhan nga nabuhat ngan naato para ha ira mga katungod. Nakasumpay ini ha ira pagbiling han hustisya para ha yukut-yukot nga biktima ngaduha han gerra kontra druga ngan han pampulitika nga panmuypoy ha mga organisasyon masa.

Atubangan han krisis ha ekonomiya, dugang nga nagkukusog an guliat han hiluag nga masa para ha makaburuhi nga suhol, pakabuhian ngan seguridad ha trabaho, reporma




ha tuna, paghimubo han presyo han mga paplitan ngan rolbak ha presyo han lana, katungod ha pabalay, ngan iba nga mahugot nga demokratiko nga demanda.

"Marcos Sukton, Duterte Papagbatunon" an padayon nga guliat han katawhan. Kasumpay dinhi an panawagan nga ipadayon an pagbisita kan Sara Duterte para papagbatunon hiya ha iya mga krimen. Nakasumpay liwat an guliat nga arestuhon ngan bistahon ha ICC hi Bato dela Rosa ngan iba pa nga kakunsa-bo ni Rodrigo Duterte ha madugo nga gerra ha druga. Nakakaw-it liwat an guliat nga papagbatunon hi Marcos ngan iya mga upisyal ha bilyun-bilyon kapiso nga iginbursa ha mga *flood control* nga proyekto ngan iba pa nga dagko nga korapsyon.

Sobra nga dismayado an katawhan ha butaray nga pagpatakas han pira ha dunot nga gubyrno ngan pagpapakuri han hiluag nga masa han katawhan. Nagriribalay man an mga burukrata kapitalista, nagkakaurusa hira ngatanan ha pagdepensa ha sistema nga nagpapakuri ha katawhan.

Diri nasusumo an katawhan nga sukton ngan papagbatunon an mga burukrata kapitalista ngan pasista ha ira mga krimen ngan pagpapakuri ha masa nga katawhan. Kinahanglan pursigido nga ipahibaro ha katawhan nga waray malalauman nga tinuod nga hustisya an katawhan ha ilarum han naghahadi nga reaksyunaryo nga estado, nga tikang ha katikangan, darangpan han mga pasista ngan parupangawat ha pondo han katawhan.

Dako nga ayat ha mga pwersa nga nasyunal-demokratiko nga pursigido nga magburuhaton masa, agud ig-isa an kapukawan ngan pagasantop han katawhan ha makasaysayan ngan pankatilingban nga gamot han korapsyon ha nasud. Ayaw pagruhaduha ngan bug-os-kusog nga magpropaganda ha masa, buguson an ira mga organisasyon, ngan pakusgon an ira sikreto nga rebolusyunaryo nga paggios. Pakusgon an guliat nga tapuson an burukrata kapitalismo, imperyalismo ngan pyudalismo, ngan ipasulong an nasyunal demokratiko nga pababag-o. AB

<div style="text-align: center;">  <p>Bolyum LVII Ihap 10 Mayo 21, 2026</p> <hr/> <p>Igin-gagawas an Ang Bayan ha lenggwahe nga Pilipino, Bisaya, Iloko, Hiligaynon, Winaray ngan Ingles. Nakarawat an Ang Bayan han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton mantalaan.</p> </div>	<h2 style="text-align: center; margin-bottom: 0;">Gin-uunod</h2> <p>Editorial: Ipasulong an interes han katawhan ha butnga han burukrata kapitalista nga ribalay 1 Guliat han katawhan: Sara Duterte, papagbatunon! 3 Arestuhon hi "Bato," panawagan han katawhan 3 Plano nga kampo militar ha N. Samar, napugngan 3 Pakigbisog han trabahador para ha CBA 3 Katungod ha tuna ngan panginabuhi, ipakigbisog! 4 Parag-uma nga T'boli, ginpatay han 105th IB 4 An kamatuoran ha masaker ha Toboso 5 Negros 19, ginpasidunggan 6 Pagsaludar ha mga bayani han Negros ngan ICR! 6 Ha dagmit nga pulong 7 ASEAN 2026: Tagdumara han interes han US 8 Al Nakba 78: Pag-ato han mga Palestino 9 Pagpahiluag han panmilitar nga presensya han US 10 Mga Pilipino, nakig-usa ha Palestine 10 2 <i>hors de combat</i>, namatay ha kamot han militar 10</p>
<p>An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas</p>	
<div style="display: flex; justify-content: space-around;">  ang.bayan@cpp.ph  cpp_angbayan </div>	

Guliat han katawhan: Sara Duterte, papagbatunon!

HA NAKALABAY NGA mga semana, ha pamumuno han Bagong Alyansang Makabayan (Bayan) dirudiretso an protesta han mga progresibo nga grupo agud ipanawagan an hag-id nga pagbista ngan pagpapabaton kan bise presidente Sara Duterte. Inunhan na an reklamo nga *impeachment* kontra kan Duterte tikang hin binotos an mayoriya han Kongreso agud ig-*impeach* hiya tubtub ha pagtitirok han mga senador agud bug-uson an usa nga *impeachment court*.

Hadton Mayo 11, ha botos nga 257-25 gin-*impeach* o ginkasuhan han Kongreso hi Dutere ha ikaduha nga higayon ha mga kaso nga *betrayal of public trust*, korapsyon, panhukip ngan grabe nga pananarhug. Pinasar an *impeachment* ha luyo han pananarhug han barkadahan nga Duterte, pinaagi han partido nga PDP Laban, kontra ha mga magbaralaud.

Hadton Mayo 18, ginbug-os han mga senador an *impeachment court* nga magbibista kan Duterte. Ginpangunahan ini han bag-o nga gin-eleher nga Senate President nga hi Alan Peter Cayetano, lanong nga maka-Duterte. Pormal na liwat nga iginrehistro ha *impeachment court* an ngaran han 11-katawo nga prosekusyon han Kongreso.

Tikang Mayo 11, susrunod an mga paggios han mga nasyunal demokratiko nga organisasyon para iduso an pagbista kan Duterte. Lain ha Metro Manila, nagkamayda han mga protesta ha mga syudad han Baguio, Cebu, Iloilo ngan Davao.

Arestuhon hi "Bato," hiluagan nga panawagan han katawhan

HILUAGAN NGA GINKUNDENAR han magkalain-lain nga organisasyon an pagkunsinte ngan pagdepensa han Senado kan Sen. Ronald "Bato" dela Rosa, kahaman han pag-atentar nga salawdan hiya han mandamyento de aresto nga iginsapubliko han International Criminal Court (ICC) dapit kulop hadton Mayo 11.

Nakasuhan hi dela Rosa komo "indirect co-perpetrator" ha mga krimen kontra ha bug-os nga katawhan han pagpatay, nga mayda kalabutan ha "war on drugs." Luggop hini an mga insidente han pagpatay giutan han Hulyo 3, 2016 tubtub Abril 2018, hadton hiya pa an hepe han Philippine National Police.

Linutaw hi "Bato" hiton nga adlaw para ha maniobra nga igbutang hi Cayetano komo bag-o nga presidente han Senado. Unom kabulan na hiya nga nagtingago ha kahadlok nga ipaaresto ngan dad-on ha The Netherlands.

Iginbutang hiya han Senado ha ilarum han *protective custody* agud maseguro nga diri hiya maaaresto. Hadton Mayo 13, naghimo han drama an mga kaalyado niya nga mga senador para makaeskapo hiya ngan bumalik ha pagtinago.

Hadton Mayo 20, nagpagawas an Korte Suprema han desisyon nga diniri nga paundangon an pagsalawad han mandamyento de aresto han ICC ha iya. Ha yana, iginkokondisera hiya nga pugante.

Plano nga kampo militar ha baryo ha Northern Samar, napugngan

NAPAASTRAS HAN MGA residente han Barangay Imelda, Las Navas, Northern Samar an plano han mga tropa han 20th IB nga magtindog han kampo militar hirani ha ira komunidad. Mahugot ini nga gintipahan han mga residente ha usa nga assemblya hadton Marso.

Plano nga itindog an kampo ha usa nga bulod nga waray pa 50 metros an distansya ha urhi nga balay ha usa nga sityo. Sigon ha mga residente, sukwahi ini ha igin-tatalaan han internasyunal nga matawo nga balaud nga minimum nga distansya nga 500 metros tikang ha komunidad han mga sibilyan.

Ha assemblya, patag-usa nga nakig-agaway han mikropono an mga residente tikang ha mga sundalo para magpahayag han pagtipa ha kampo. Ha urhi, tutulo nga residente la an "tinugot" ha pagtitindog.

Ha luyo hini, nagkakampo pa gihap an mga armado nga tropa ha balay han mga sibilyan ha baryo. Iginpadayon gihap hini an pagtitindog han kampo ha gawas han barangay kundi hirani pa gihap ha aragian tikadto ha bungto.

Pakigbisog han trabahador para ha CBA

NAGLANSAR HAN MAGKALAIN-LAIN nga balitang han duruyog nga paggios an mga trabahador ngan unyon hini nga Mayo agud ipakigbisog an ira mga katungod ngan kaupayan pinaagi han *collective bargaining agreement* (CBA).

Ha Day 1 Craft Philippines Inc ha Laguna, nagmadinaugon an masobra duha kasemana nga welga han mga trabahador komo pakigbisog para ha makatadungan nga CBA. Nakab-ot nira an demanda para ha dugang nga suhol ngan iba pa nga katungod. Naghihimo hira han higtaas nga klase han paon ha isda.

Ha LBC Express Metro Manila, nagsubmiter an mga trabahador han *notice of strike* ha butnga han pito kabulan nga *deadlock* ha negosasyon para ha CBA. Sensilyo nga ₱32 nga dugang nga suhol ha tulo katuig an tanyag han kapitalista, hirayo ha panawagan nga ₱72 nga kadugangan. Ginsukna liwat nira an kontraktwalisasyon ha mga trabahador nga gin-gagamit nga taktika agud bungkagon an unyon ngan hikawan hira han katungod.

Ha PLDT, nagmartsa an mga superbisor han kompaniya ha pangunguna han unyon nga GUTS-PLDT hadton Mayo 15 ha hedkwarters han kompaniya ha Makati City. Nagkamayda liwat han mga paggios ha Quezon City, Cebu City ngan Davao City. Baton nira ini ha kawaray pag-unhan han negosasyon para ha 2026-2028 CBA. Ginkundenar nira an taktika han tuyo nga pag-delatar ngan pambabarat han maneydsment ha negosasyon.

Ha kompaniya han barko nga Philippine Span Asia Carrier Corp ha Manila, nagpiket an mga trabahador agud igpakita an suporta ha unyon nga haros pito kabulan na nga nakikignegosasyon para ha CBA. Iginpapasulong nira an dugang nga suhol ngan iba pa nga mga katungod.

Mga parag-uma, parupangisda ngan minoriya:

Katungod ha tuna ngan panginabuhi, ipakigbisog!

Ha magkalain-lain nga dapit han nasud, nagios an mga parag-uma, parupangisda ngan minoriya para ha ira katungod ha tuna, panginabuhi ngan puruy-anan kontra ha mga lokal ngan langyaw nga korporasyon ngan ha atubangan han pagpasibaya ngan pasismo han rehimen Marcos.

Ha Benguet, naglansar han *prayer vigil* an mga *porter*, parupangisda ngan residente ha La Trinidad Vegetable Trading Post hadton Mayo 13 agud kundenahon an pag-import han Department of Agriculture han mga karot. Igin-anunsyo han departamento an plano nga pag-import hini han 6,000 metriko tonelada han karot para ha Abril, Mayo ngan Hunyo agud batunon kunuhay an kakulangan ha suplay ngan mapahimubo an presyo hini ha merkado.

Ha Isabela, pira kanapulo nga parag-uma tikang ha magkalain-lain nga bungto han prubinsya an nagtirok ha asembleya han Dangayan Dagiti Mannalon ti Isabela (Dagami) ngan nagmartsa ha Santiago City hadton Mayo 11 agud manawagan han tinuod nga reporma ha tuna, suporta ha produksyon, ngan pag-uundong han katungod han parag-uma. Ha asembleya, ginbug-os nira an usa katuig nga plano han aksyon ngan igin-anunsyo an bag-o nga gin-eleher nga upisyal ngan lider

nga magpapadig-on ha organisasyon ha butnga han krisis ha kabaryuhan.

Ha Dagupan City, Pangasinan, nagtirok an gudti nga parupangisda ha usa nga konsultasyon nga ginpa-ngunahan han Pamalakaya hadton Mayo 11, agud tipahan an komersyal nga pangingsda ha sakob han 15-kakilometro nga *municipal waters*. Iginkakabarak-an nira an pagdamo han dagko nga baloto ha Lingayen Gulf kasunod han desisyon han Korte Suprema hadton Disyembre 2024 nga nagtutugot ha dagko nga kompaniya nga mangisda dinhi. Plano nga makigdayalogo han grupo ha BFAR Region 1 agud ig-insister an proteksyon ha ira pakabuhian.

Ha Nueva Viscaya, nagtindog han barikada hadton Mayo 9 an mga residente han Pao, Paquet ngan Kakidugen ha Kasibu komo pagtipa ha proyekto nga eksplorasyon han North Luzon Mineral Resources Corporation. Igintindog an mga barikada agud ulangon an pagsulod



han mga gamit han kompaniya ngan lana ngan paggawas han *mineral sample*. Luggop han eksplorasyon an 4,456 kaektarya han anestral nga tuna han Bugkalot/Ilongot para ha pagmimina han bulawan ngan tanso.

Ha Quezon City, nagbarikada an mga residente ngan parag-uma han Pook Malantik, Barangay UP Campus hadton Mayo 20 agud pugngan an pagsulod han mga materyales para ha konstruksyon han UP-DSHUD Housing Project nga kaparte han namamangpangan nga proyekto han UP SDG Wellness Park. Mapapalayas han konstruksyon han Megawide Construction Corporation an mga residente. Usa nga bulag nga rali an ginhimo hadton Mayo 12 han kasapit nga komunidad nga Pook Aginaldo kontra ha proyekto.

Ha Bukidnon, ginkundenar han mga katutubo nga Manobo an pagkukudal ngan panlulupot han Green Arrow Agriventures Inc-Kennermer Foods International ha ira anestral nga tuna ha Don Carlos. Plano han kompaniya nga pahilugan an plantasyon hini han saging ha gin-aagaw nga tuna. Gin-gagamit an Support to Parcelization of Lands for Individual Titling (SPLIT) Project han World Bank para ha panlulupot ha anestral nga tuna. **AB**

Parag-uma nga T'boli, ginpatay han 105th IB

MASOBRA USA KABULAN na nga waray nakakab-ot nga hustisya an pamilya ngan kaurupdan han parag-uma nga T'boli nga hi Jonathan Kubot tikang han patayon han mga sundalo han 105th IB. Ginpatay hiya han militar hadton Marso 25 ha Sityo Lam-afus, Barangay Lambangan, T'boli, South Cotabato.

Sigon ha report, kahuhuman pa la magsabnit han hagna ni Kubo han makit-an hiya han mga sundalo. Ginsikmit hiya hini, iginpailarum ha tortryur, ngan pwersahay nga ginpaamin nga mangaraway hiya han Bagong Hukbong Bayan (BHB). Ginpatay hiya han waray makuha nga impormasyon tikang ha iya.

Samtang, nakagawas hadton Mayo 9 an duha nga Dumagat nga priso pulitikal nga hira Rocky Torres ngan Abelardo "Dandoy" Avellana kahuman han haros walo katuig nga detensyon. Iginbasura han korte an hinimu-himo nga mga kaso han pagpatay ngan *illegal possession of firearms and explosives* kontra ha ira.

Ginsikmit hira han militar hadton Mayo 14, 2018 ha General Nakar, Quezon, kahuman han usa nga engkwentro ha BHB. Samtang nakapriso, nahiagum an duha han grabe nga tortryur, pisikal nga pangastigo, ngan pagraut han panlawas.

An kamatuoran ha masaker ha Toboso

Napamatud-an ha iginlansar nga National Fact-Finding and Solidarity Mission (NFFSM) han mga progresibo nga grupo ha Barangay Salamanca, Toboso, Negros Occidental hadton Mayo 14 an luun-luon nga mga pagtalapas ha tawhanon nga katungod ngan internasyunal nga makatawo nga balaud han 79th IB ha nahitabo nga masaker ha Toboso. Gin-imbestigahan hini an pagpatay han militar ha 10 nga Pula nga mangaraway han Bagong Hukbong Bayan (BHB) ngan siyam nga diri armado nga mga indibidwal hadton Abril 19 ha Barangay Salamanca ngan kasumpay nga mga panhitabo.

Diri mamenos ha 117 nga delegado an nagpartisipar ha misyon nga ginkokomponer han mga lokal ngan langyaw nga tagdependa han tawhanon nga katungod, magbaralaud, aktibista, tawo ha singbahan, lider-estudyante ngan mamamahayag. Gin-himo ini ha pag-imbatar han mga grupo tikang Negros Island, ha pangunguna han Manindigan-Negros.

Ha kadako ngan kahiluagon han delegasyon, waray ini mabantad han grabe nga militarisasyon ngan pan-gigipit han militar ha Toboso ngan bug-os nga isla. Naduso hini an mga lokal nga gubyerno ngan upisyal nga tugutan an aktibidad. Ginsuportahan ngan ginbendisyanan liwat hira ni San Carlos Bishop Gerardo Alminza. "An iyo determinasyon nga bilngon an kamatuoran ha butnga han kahadlok ngan panarhug usa nga kongkreto nga pagpamatuod nga importante pa gihapon an kamatuoran, hustisya, ngan kamurayawan," pahayag niya.

Partikular nga ginkadto han delegasyon an Sityo Sinugmawan ngan Sityo Plaringding kun diin nahibatian han mga residente an mga buto han pusil. Ginkadto han delegasyon an kada lokasyon han mga insidente kun diin nira nakit-an an mga igo han bala ha mga kahoy, nahibilin nga mga basiyo han bala ngan iba pa nga panigamnan han panmusil.

Naghimo hira han mga *focused group discussions* ngan pagbalay-balay agud mainterbyu an mga residente. Nakaestorya nira an diri mamenos ha 30 nga residente nga sering nira mahikokonsidera nga mga "yawe nga impormante" tungod kay mayda hira direkta nga eksperyensya ha mga panhitabo.

Iginlaygay han mga residente

an "pagbisita" ngan panhalikwat han mga sundalo ha diri mamenos ha 18 nga kabablayan ha pagbiling ha ginsesering nga mga mangaraway han BHB. Ha Sityo Plaringding, mayda kaso han pagdakop han 79th IB ha usa nga mag-iroy nga tikadto ha pangisdaan agud manguha hin pangtion. Gindara an mag-iroy ha usa nga bulod kun diin hira iginpailarum ha interogasyon. Nahikit-an han mag-iroy tikang dinhi an waray hunong nga panmusil han mga sundalo ha pangisdaan. Naggamit liwat han mga *drone* an 79th IB.

Nakumpirma an pwersahay nga pagpapaebakwet han 79th IB ha 653 nga indibidwal tikang Abril 19 tubtub Abril 22. Tungod hini, waray nainterbyu an mga delegasyon nga makakapagpamatuod ha pahayag han 79th IB nga nagkamayda han

grabe nga agway ha pangisdaan kun diin ginsesering nga natad-an an mga patay nga lawas han 19.

Ginpamatud-an han mga residente nga diri mamenos ha unom ha 19 nga mga ginmasaker mga sibilyan. Sering nira, personal nira nga nakaestorya an lider-estudyante nga hi Alyssa Alano, mga organisador han parag-uma nga hira Maureen Santuyo ngan Errol Wendel, mamamahayag nga hi RJ Ledesma, ngan mga Filipino-American nga aktibista nga hira Kai Sorem nga Lyle Prijoles. Sering han mga residente, kan-o man waray nira mahikit-an nga mayda dara-dara nga armas an unom ha ira pag-ukoy ha komunidad.

Sigon ha Unyon ng mga Mangagawa sa Agrikultura (UMA), an pahayag han mga residente nasuporta ha igin-iinsister han mga progresibo nga grupo nga iginpadara an mga sibilyan ha Barangay Salamanca agud mangaliskay. Aada hira ha barangay agud bumulig ha pag-oorganisa ngan pagbug-os han pankatilingban nga imbestigasyon ngan pag-aram ha kamutangan han mga parag-uma ngan trabahador ha uma, partikular ha Hacienda Bedonia. Luggop han asyenda an 18 kaektarya han tuna nga

ginhuhulad han 16 kapamilya han trabahador ha uma nga maiha na nga angay ighatag ha ira.

Ha mga datos nga nakuha, nakumpirma han delegasyon an mga krimen han 79th IB. Kalakip dinhi an paggamit han militar ha balay han mga sibilyan, pan-gigipit ngan panhadlok ha mga residente, paghuhugot ha mga buruhaton nga panguma, waray hunong nga panmusil hirani ha mga kabablayan, iligal nga pagpriso, ngan an paggamit ha usa nga parag-uma komo taming.

Napamatud-an liwat han delegasyon nga mayda "evidence tampering" o paglabot ngan pagtanum han mga ebidensya (mga armas, bandolyer ngan personal nga higamit) agud pagawason nga tinuod an estorya nga iginpapasarang han 79th IB. Labot dinhi, ha report



Sundan ha paypay 6

Negros 19, ginpasidunggan komo pinakamag-upay nga anak han katawhan

Nag-urupod ha University of the Philippines (UP)-Diliman Theater ha Quezon City hadton Mayo 11 an sumobra-kumulang 2,000 nga kapamilya, kasama, sangkay, ngan mga bisita agud tagan pasidungog an mga martir han Toboso o kilalado komo Negros 19. An mga martir ginkokomponer han siyam nga diri armado nga indibidwal ngan 10 nga Pula nga mangaraway han Bagong Hukbong Bayan (BHB) nga ginmasaker han 79th IB hadton Abril 19 ha Barangay Salamanca, Toboso, Negros Occidental.

An programa han pagpapasidungog ginpangunahan han UP Diliman University Student Council, Bagong Alyansang Makabayan (Bayan) ngan Karapatan. Sigon ha mga organisador, iginlansar an katitirok para magkakaupod nga kilal-on an kaisog, kabaltok, ngan paghigugma nga iginhalad ha katawhan han bugos nga Negros 19.

Masobra duha kaoras an ginlantar han pagpasidungog nga napuno han mga pahayag, mensahe, bidyo, ngan mga pagsundayag han rebolusyunaryo nga kanta, luwa ngan sawaw. Iginpalandaw hini an kinabuhi han paseserbe ha masa han Negros 19 ngan an diri napeperdi nga pagato han masa nga Negrosanon ha

butnga han nagpapadayon nga kakurian, paniniyupi, ngan militarisasyon ha isla han Negros.

Tinambong ngan naghatag han mga mensahe ha pagpasidungog an mga kaurupdan ngan sangkay nira Alano, Ledesma, Santuyo, Errol Wendel, Prijoles ngan Sorem. Napuno han mga estorya han kinabuhi, entremis ngan kalipayan, militansya ngan naglalarab nga kalayo han pagkigbisog an ira mga mensahe.

Ha mensahe han iroy ni Alano nga hi Shiela, nagpahayag hiya han paglaum nga igpapadayon han nahibilin nga mga kasama an hingyap ni Alano para ha nasud. "Ayaw naton pasagdi nga mapara hiya hini nga kalibutan... Nananawagan ako, nga

igpdayon naton an pakigbisog nga nantikangan nira. Tungod kay maaram kita ngatanan, ini an karuyag nira, pagbabag-o han sistema, mabuligan an mga kablans han Negros," sering niya.

Nagpaabot naman han usa nga mensahe han pagpasidungog hi Marco Valbuena, puno nga upisyal ha impormasyon han Partido Komunista ng Pilipinas. "An Partido ngan han Bagong Hukbong Bayan napasidungog nga ha hilaba o halipot nga panahon, nakaupod an mga martir ngan bayani han Toboso ha dalan han nasyunal demokratiko nga rebolusyon. Saad namon nga hatagan hin hustisya an ira kamatayan," sering niya.

"Tikang ha tuna nga ginsaribuhan han ira dugo, yukut-yukot pa han mga anak han katawhan an maturok, mabuhat, maalsa ngan mahasog ha hilaba ngan barubaliko nga dalan han gerra han katawhan ngadto ha mapula nga adlaw han kadaugan," pahayag ni Valbuena. Nahuman an katitirok ha pagkanta han Internasyunal. AB

Tikang ha paypay 5

han *forensic pathologist* nga hi Dr. Fortun mayda mga igo ha likod an tulo nga ginpatay kundi ha mga ritrato han patay nga lawas nga iginpasarang han militar kadam-an nakatihaya ini. Nadiskubre liwat nga an pira ha mga biktima posible nga namatay ha sobra nga pagdinugo.

Klaro liwat kuno an kawaray respeto han mga sundalo ha mga patay nga lawas han biktima. Duha kaadlaw nira nga ginbayaan nga nakabulad ha adlaw ngan nakababad ha tubig han pangisdaan an mga patay nga lawas ngan "ginrekober" la hadton Abril 21. Nagkabayuay pa an patay nga lawas han duha ha mga ginpatay.

Ha paghuman han misyon, panawagan han delegasyon an baratunon ha 79th IB ngan 303rd IBde, kadungan han paghuman ha militarisasyon ha Negros Island. Igin-iinisister nira an hustisya ha mga ginmasaker ngan ha ngatanan nga pamilya han biktima.

Samtang, gin-gipit an delegasyon han mga pwersa han estado. Ginsundan han mga sundalo an mga tim nga naghimo han imbestigasyon ngan ginkuhaan hira han mga ritrato. Dinagsa liwat an mga sundalo han 79th IB ha Barangay Salamanca hadton Mayo 13, usa kaadlaw antes an misyon. Usa nga Amerikano nga delegado tikang ha International Coalition for Human Rights in the Philippines an ginpugngan nga makasulod ha Pilipinas ha pagraron nga "blacklisted" hiya ha nasud.

Pagsaludar ha mga bayani han Negros ngan ICR!

NAKATANGHAL AN MGA armas ngan nakaalsa an kamao han mga rebolusyunaryo nga pwersa ha bug-os nga nasud para ha mga martir han Bagong Hukbong Bayan (BHB) nga namatay hini nga Mayo.

Ha Negros Occidental, napatay ha agway ha 15th IB an lima nga Pula nga mangaraway han BHB-Southwest Negros (Armando Sumayang Jr Command) ha Barangay Abaca, Cauayan hadton Mayo 16. Namartir hira Vince Francis Dingding (Ka Poy/Moymoy), sekretaryo han komite han Partido ha prente, hi Rolando Dantes Jr (Ka Anyo), kumander han BHB-Southwest Negros, hira Jobert Casipong (Ka Robi), Gilbert Tingson (Ka Kolintong/Ka Downy), ngan Alex Languita (Ka Kaya).

Ha rehiyon nga Ilocos-Cordillera, namatay ha kanser an Pula nga mangaraway nga hi Inocencio Sibud (Ka Maki) hadton Mayo 14. Syahan nga narekrut hi Sibud komo membro han unit han milisya han katawhan ha Barangay Bayao ha Pinukpuk, Kalinga hadton dekada 1980. Nagpadayon hiya ha iya rebolusyunaryo nga buruhaton ngan kumatin han magkalain-lain nga mga buruhaton ha sakob han 37 katuig nga pagseserbe ha BHB.

Gintagan han Partido han pinahitaas nga pagkilala ngan pagdakila an mga martir han hukbo han katawhan nga ginbansagan ini nga "pinakamag-upay nga mga anak han katawhan."



32

nga kaso han ekstra-hudisyal nga panmatay an nakabutang ha mandamyento de aresto han ICC kan Ronaldo "Bato" de la Rosa. Ginkasuhan hiya han kaso nga mga krimen kontra ha katawhan han pagpatay komo "indirect co-perpretrator" ha buwa nga gerra kontra-druga.

54%

pagdako han karikuhan han lima nga pinakariko nga bilyunaryo ha Pilipinas, tikang 1.1 katrilyon hadton Hunyo 2022 ngadto ₱1.7 katrilyon ha Marso 2026.



16

nga botos (2/3 han nakalingkod nga 24 nga senador) an kinahanglan agud masentensyahan nga salaan hi Sara Duterte; 9 la para mapawarayan sala hiya ngan magpabilin ha pwesto.

2

nga Type 88 *surface-to-ship missile* an ginpalupad han Japan ha sakob han teritoryo han Pilipinas hadton Mayo 6. Ini an pinakasyahan nga higayon nga naghimo an Japan han *missile launch* kahuman han World War II, nga talapas ha kalugaringon hini nga kontra-gerra ng konstitusyon.



617

nga kahoy ha kahalab-on han Quirino Avenue ha Manila an basta nala gintugutan han DENR-NCR nga utdon ngan bugnuton para wadahan an konstruksyon han 4 km nga Southern Access Link Expressway han San Miguel Corporation.



17

nga lokasyon ha Pilipinas an gin-gamit han 3rd Marine Littoral Regiment, yunit militar han US, komo lansaran han *war games* ha naglabay nga Balikatan 2026. Kadak-an hini iginsikreto ha publiko ngan mga residente ha mga komunidad.



9 kaadlaw

nga dirudiretso nga pankabug-usan nga welga an ginlansar han mga trabahador ngan minoriya ha Bolivia agud patalsikon an maka-US nga presidente han nasud nga hi Rodrigo Paz Pereira.

Kadungan nga ginpugngan han pankabug-usan nga welga an nahireport nga armado nga panginginlabot han US agud sikmiton an kontra-imperyalista ngan hadto anay presidente hini nga Evo Morales.

100,000+

kabataan nga mga US *citizen*, kaupod an mga puya, an nahimulag ha ira mga kag-anak nga gindakop, gindetiner, o ginpadeport han rehimen Trump ha mga operasyon nga kontra-imigrante

Ginkuhaan: Brookings Institution



ASEAN 2026: Tagdumara han interes han imperyalismo nga US

Hadton Mayo 6-8, gindumara han Pilipinas an ika-48 nga ASEAN Summit ha Lapu-Lapu City, Cebu, ha tema nga "Navigating our Future, Together." Deklarado nga katuyuanan han katitirok nga ipasulong an kooperasyon, pan-ekonomiya nga kadig-on, ngan nasyunal nga seguridad ha pagkaon ngan enerhiya ha butnga han natikagrabe nga pankalibutan nga tensyon. Sentro nga talakayan an epekto han sumpakiay ha Middle East nga nagdurot han pabarubag-o nga presyo han enerhiya, kadelatar han suplay, ngan paghitaas han gastos ha pagkaon ngan transportasyon nga pabug-at ha mga nasud ha ASEAN.

An ASEAN usa nga hugpong ha pulitika ngan ekonomiya nga gintukod hadton 1967 ha panahon han Gerra ha Vietnam komo pansagang ha komunismo ngan para magserbe nga instrumento han neokolonyalismo. Hadto ngan yana, makusog an impluwensya dinhi han US komo "komprehensibo nga estratehiko nga kabakyang" ha rehiyon. Nagpapabilin nga makusog an katin han US pinaagi han panmilitar ngan ekonomiya nga alyansa, hasta an China nga prinsipal nga kabakyang ha negosyuhay han mga membro nga nasud hini.

Kahuman han pira kaadlaw han pagmimiting, waray kongkreto nga programa an mga delegado agud batunon an nahiaaguman nga krisis ha rehiyon. Nagkasarabot hira ha pira nga pitad agud maibanan an epekto han panmilitar nga agresyon han US ha Iran, kundi aminado hira nga maiha pa antes ini mahipapatuman.

Usa dinhi an proposisyon nga "Regional Fuel Sharing Framework" nga waray mekanismo kun tipaunan-o an pagpapatuman, prayoridad han distribusyon, o paggamit dinhi para ha madagmit nga pagbaton ha presente nga krisis.

Ha kabug-usan, nakapokus an mga lider ha koordinasyon ha panahon han *emergency*, presyo han lana, seguridad ha pagkaon, ngan pankadagatan nga operasyon. Nagpapabilin nga haligot ngan nakapokus ha pag-administar an balayan han mga ginkahisgutan. Ginkilala han kapunungan komo dako nga dugsang an agresyon han US ha Middle East kundi waray ini pagkundera dinhi. Waray igin-gawas nga ginkaurusahan nga pahayag an ASEAN kontra ha henosidyo han Israel ngan US ha Palestine, bisan kun mayda pira nga

membro nga nasud nga dayag nga nasuporta ha pakigbisog nga Palestino.

Ha butnga han kawaray solusyon ha mga krisis ha ekonomiya, nakigsarabot pa hi Marcos para ha panmahiaan nga pag-import han bugas tikang ha Vietnam. Ha luyo ini han destroso nga durot han importasyon ha lokal nga produksyon han humay ngan dugang nga pagkalugi han mga parag-uma.

Militarisasyon ha ASEAN

Antes an ASEAN Summit, iginlansar ha Pilipinas an pinakadako nga Balikatan *war exercises* ha kasaysayan hini. Landaw dinhi an pagpapalupad ngan pagpapabuto han mga misayl han US ngan Japan hadton Mayo 5 ngan 6. Ini nga mga operasyon nagpatarum ha kontradiksyon ha giutan han mga nasud ha rehiyon ngan Pilipinas. Samtang iginwawasiwas han ASEAN nga katuyuanan hini an kamurayawan ngan diplomasya, igin-aabre naman han niyutiyo nga estado han Pilipinas an nasud komo uruyagan ngan "diri nalulubog" nga base militar han US.

Agud kunuhay "diri mahinugad an South China Sea ha Strait of Hormuz" ngan maseguro an katalwasan ha paglalayag dinhi, igin-insister han rehimen US-Marcos an pagpapadig-on ha Declaration on Maritime Cooperation. Usa nga importante nga parte hini nga proposisyon an paghimo han usa nga ASEAN Maritime Center nga tutukuron ha Pilipinas. Ini kuno magseserbe komo prinsipal nga tirukan para ha mga isyu nga pankadagatan nga ihahaum ha mga kasapit nga nasud han ASEAN.



Ini nga mga pitad, imbes nga magpakalma, labaw nga magpapapintas han tensyon ha South China Sea.

Pasismo ngan pagtahub ha kakurian

Hadton Mayo 6, naglansar han porum nga "Imperialist Crisis and War: A People's Alternative to the ASEAN Summit" ngan protesta kontra ha ASEAN Summit an mga progresibo nga grupo ha University of the Philippines-Cebu. Samtang ginhihimo an mga aktibidad, sumobra-kumulang 200 nga pulis an nahikit-an ha sakob ngan gawas han unibersidad nga nagsasarbeylans.

Ha pareho nga adlaw, nagprotesta an mga membro han Greenpeace Philippines ha gawas han *summit* agud ipanawagan an pagbaton ha polusyon ha plastik, suknaon an sobra-sobra nga pagsarig ha lana, ngan tagan-duon an krisis ha klima ha rehiyon. Upat nga membro hini an gin-aresto antes pa man magtikang an protesta.

Agud diri makit-an han mga delegado an mga kabras ha Cebu, temporaryo nga iginbalhin han lokal nga gubyerno an aada ha 66 nga pamilya nga naukoy ha likod han Mactan Expo kun diin iginlansar ang summit ngadto ha usa nga *resort* ha kasapit nga bungto han Cordova. Nagpapabilin hira ha lugar tikang Abril 27 tubtub Mayo 9. Gintahuban han dagko nga tarpolin an ira mga malay-balay.

AB

Madig-on nga pag-ato han katawhan Palestino para ha nasyunal nga katalwasan

Hadton Mayo 15, ginhandum han katawhan Palestino an ika-78 katuig nga anibersaryo han Al Nakba ha butnga han nagpapadayon nga gerra nga henosidyo han US-Israel. An Al Nakba (An Kataragman) an madugo nga pagpapalayas han mga Zionista nga grupo ha Palestine hadton 1948 agud tukuron an estado nga "Israel" ha duso han imperyo nga British.

Iginkokonsidera han katawhan Palestino an nagpapadayon nga henosidyo komo "bag-o ngan mas brutal nga balitang han Al Nakba." Sugad han nakalabay, kalakip hini an tinagdamo nga panmasaker, pagpapagutom, panruba han mga balay ngan imprastruktura, ngan pwersahay nga pagpapalayas para hul-os nga paraon an tulin nga Palestino.

Tikang Oktubre 2023, ginpulbos han mga Zionista an bug-os nga Gaza gamit an mga bala ngan bomba nga ginhimo ngan ginhatag han US. Ha upisyal nga report, naabot na ha 75,000 an direkta nga ginpatay han pangatake, ngan gatus-gatos kayukot pa an diri direkta nga namatay ha kagutom, sakit, nalubong ha narumpag nga mga bilding ngan mga waray matad-an. Waray humunong an mga Zionista ha pangatake bisan kun nakigsarabot ini ha ukoy-bubto tikang Oktubre 2025.

Igintalaan han Zionista nga estado an panibag-o nga pangangagaw han tuna pinaagi han pagpintar han "yellow line" ha sakob han Gaza. Nagtindog ini han 13 nga bag-o nga panmilitar nga detatsment agud ipailarum ha kontrol hini an 53-58% han teritoryo. Ginlupgop hini an 50-60% han mga tuna nga umhanan samtang ginpriso an mga Palestino ha piguot nga sentro han ebakwasyon nga hirayo ha mga produktibo nga tuna ngan ira pakabuhian.

Kadungan han henosidyo ha Gaza, hinay-hinay nga ginlupgop han Israel an bug-os nga West Bank ngan East Jerusalem. Kada adlaw, nahiaagum an mga Palestino dinhi han pan-gigipit, sarbeylans, ngan pagpapalayas. Ha katapusan han 2025, masobra 700,000 na nga Zionista nga dapon an naukoy ha masobra 250 nga ilegal nga *settlement* ha


sakob han nasering nga mga lugar.

Diri mapaperdi

Ha luyo han kamadarahug ngan teror han pananakop, madig-on an paninindugan han katawhan Palestino nga magpabilin ha ira nasud, sugad liwat an katungod han ngatanan nga napalayas nga bumalik ngan bawion an tuna ngan mga teritoryo nga gin-agaw ha ira. Katin an nakalabay nga masobra usa kasiglo han mga rebolusyon ngan pag-aalsa, diri hira natugot nga mahitabo an usa pa nga kataragman, o "Al Nakba 2.0."

Tikang han iginlansar an Al Aqsa Flood, an armado nga pag-aalsa hadton Mayo 2023, utro nga napamatud-an an katukmaan han pakigbisog nga Palestino. Utro nga nabutang an ira makatadungan nga pag-ato ha mga sentro han mga internasyunal nga institusyon. Komo suporta, milyunmilyon an binuhos ha mga kakalsadahan han Europe, America, Africa ngan Asia. Ginkilala han kalibutan an pakigbisog komo pag-ato para ha katalwasan, hustisya, dungog, ngan para ha bug-os nga katawhan ngan diri sumpakiay la ha mga bawnderi, ngan diri gud kasumpay ha "pagdedepensa ha kalugaringon" han Israel.

Labaw dinhi, nabuksas an makarimadima nga mga krimen han Zionista nga Israel nga ha maiha nga panahon iginkokonsidera na nga "normal," bisan han damo nga estado nga Arabo. Hul-os na nga natimpag an ilusyon han Israel komo "nalalain nga demokrasya" ha Middle East ngan nabuksas komo makabagong "Nazi" nga ginkakangalsan han bug-os nga kalibutan. Ginkilala an kagrabihon ngan kahiluagon han mga krimen ha gerra ngan katawhan hini ha International Court of Justice ngan International Criminal Court.



Ekspansyunismo ha duso han US

Lahos ha Palestine, ginsasakop liwat han mga Zionista an iba pa nga parte han Middle East ha ilarum han kampanya nga Greater Israel. Pinakakatuyuanan hini nga lupgupon an mga rikuhanon nga teritoryo ngan aragian tikang ha Salog nga Nile han Egypt tubtub ha Salog nga Euphrates ha Iraq.

Ha Lebanon, gintikangan hini an paglalalagat han "yellow line" nga naabot hin 10 kakilometro ha sur nga parte kahuman hini waray hunong nga bombahon an lugar tikang Marso. Ha Syria, iligal nga ginsakop han Israel an Golan Heights tikang pa 1967. Ha luyo han mga resolusyon han United Nations nga nagmamando nga igbalik an teritoryo, dirudiretso an pagtitindog hini han iligal nga mga komunidad ngan industriya ha mga parte nga riko ha tubig ngan matambok an tuna.

Aada ha luyo hini nga mga agre-syon an imperyalismo nga US, gamit an bilyun-bilyon nga panmilitar nga pondo ngan armas, agud igpabilin an kontrol ha Middle East. Nagserbe an gin-okuparan nga mga teritoryo han Israel komo dako nga estratehiko nga base militar para gipiton an mga nasud nga Arabo ngan kontrolon an mga natural nga karikuhan, partikular an lana ngan mga aragian han komersyo.

Dirudiresto nga pagpapahiluag han panmilitar nga presensya han US ha Pilipinas

W aray hunong an ginhihimo han US nga mga operasyon militar ha Pilipinas ha tahub han dagko nga *war games*. Ha paghuhuman han Balikatan 2026 hadton Mayo 8, layon hini nga gintikangan an Salaknib 2 nga mayda nartipisipar nga 7,000 nga tropa, kaupod an tikang ha Japan, Australia ngan New Zealand. Katuyuanan hini nga *war games* an pahiaran an mga tropa ha pakikigerra ha kondisyon nga muro-puro (*archipelagic*), ngan kontra-gerilya. Nahuman an Salaknib 2 hadton Mayo 20, kundi magpapabilin an mga tropa ngan higamit nga gin-gamit dinhi para ha iba pa nga *war games* tubtub Hulyo.

Prinsipal nga gintreyning ha Salaknib 2 an Joint Pacific Multinational Readiness Center-Exportable. Landaw dinhi an hiluagan nga pan-kombat nga operasyon, *small unit tactics*, gintig-ob nga mga *live exercise*, pag-atake ha gab-i tikang ha kahanginan, pagpapabuto han mga misayl, ngan agway ha kagugub-an, ngatanan ha mga "reyalistiko nga senaryo." Kapareho ha Balikatan, damo ha mga lokasyon diin ginhihimo ini gintatago ngan ginsisikreto.

Pagpapahiluag han *dual-use* nga mga pasilidad

Kadungan han mga *war games* an pagpapahiluag han US han *network* han mga pansibilyan nga pasilidad nga magagamit hini ha mga panmilitar nga katuyuanan. Pinakaurhi an pagkuha hini ha proyekto nga rehabilitasyon han Sangley Point International Airport, usa nga pansibilyan nga erport ha Cavite. Hadton Mayo 12, igin-anunsyo han US Trade and Development Agency nga popondohan hini an

usa nga pag-aram agud itransporta an erport ha *dual-use* o duhaan nga paggamit (sibilyan ngan militar) nga pasilidad. Kasosyo han US dinhi an Cavite Holdings, Inc. han pamilya nga Virata.

Samtang, kinadto hadton Mayo 1 an mga upisyal han rehimen Marcos ha Jerusalem agud aregluhon an pamumuhunan han kompaniya han Israel nga "Golden Node" han US ha New Clark City, Pampanga. Ini nga "Golden Node" an igitindog nga "economic security zone" han US nga magseserbe nga pabrika han armas ha balayan han Pax Silica. An pagsulod ngan pag-ungbaw han puhunan ngan teknolohiya han Israel dinhi direkta nga nagdadabi ha rehimen Marcos nga makangaralas nga gerra nga henosidyo ngan mga gerra nga agresyon han US ngan Israel ha Palestine ngan Middle East. AB

Mga Pilipino, nakig-usa ha Palestine

NAGTIROK AN MAGKALAIN-LAIN nga grupo ha Welcome Rotonda ha Quezon City hadton Mayo 15 komo pakig-usa ha paghandum han katawhan Palestino ha ika-78 nga anibersaryo han Al Nakba. Iginpapanawagan nira an katalwasan han Palestine tikang ha madarahug nga okupasyon han Zionista nga Israel. Ginpangunahan an paggios han Philippines-Palestine Friendship Association. Dara-dara han mga nagprotesta an mga bandera han Palestine ngan mga plakard nga nagpapahayag han suporta ha mga Palestino.

Palayason an mga sundalo nga Israeli. Nanawagan han hustisya ngan baratonon an mga residente han General Luna ha Siargao Island ha Surigao del Norte kahuman an serye han mga krimen ngan kamadarahug kontra ha ira han mga sundalo nga Israeli nga nagsarang ha isla. Nagtirok hira ha usa nga miting kaupod an mga lokal nga upisyal, pulis, mga tag-iya han negosyo ngan iba pa nga sektor hadton Mayo 12 agud talakayon an susrunod nga mga insidente han kamadarahug, pansasamok ngan pambabastos han mga sundalo nga Israeli ha Isla.

Pinakaurhi, an pinakagrabe, an pangatake han usa nga grupo han mga Israeli ha Cartoon Café ha General Luna hadton Mayo 11. Sigon ha mga report, gin-atake han mga sundalo an establisyemento kahuman makit-an an usa nga bandera han Palestine nga nakasab-ong ha gawas hini. Iginreport nga ginhibang han mga sundalo an mga CCTV camera ngan pisikal nga ginkastigo an mag-asawa nga tag-iya han negosyo, ha atubangan han ira gudti nga anak. Ini nga mga sundalo nahireport nga bag-o nga gawas pala ha "serbisyo" ha gerra nga henosidyo nga ginhihimo han Zionista nga estado kontra ha Palestine.

2 nga hors de combat, napatay ha kamot han militar

DUHA NGA *HORS de combat* tikang ha Negros Oriental ngan Masbate an nahirepot nga napatay samtang aada ha kustodiya han berdugo nga militar nga grabe nga pagtalapas ha internasyunal nga makatawo nga balaud.

Hadton Abril 23, gindakop, gintortyur ngan tuyo nga ginpatay han 62nd IB hi Dino Pane (Ka Yulo), mangaraway han Bagong Hukbong Bayan (BHB)-Central Negros ha Sityo Nabuluan, Barangay Bucalan, Canlaon City, Negros Oriental. Hi Pane nagrerekober ha sakit nga *pneumonia* ngan naabat han sobra kahitaas nga hiragnat ngan panluluya. Diri hiya armado hiton nga panahon.

Ha Masbate, napatay ha kustodiya han 2nd IB an *hors de combat* nga hi Raul Luding Tolingin hadton Mayo 14 tungod ha "komplikasyon ngan iba pa nga sakit." Samaran nga nadakop han militar hi Tolingin hadton Mayo 10 ha Barangay Miabas, Palanas kasunod han usa nga pasalida nga engkwentro. Maiha na nga mayda sakit nga *diabetes*, *high blood* ngan rayuma hi Tolingin, ngan nagpapatambal samtang naukoy ha usa nga balay ha nasering nga barangay. Tulo kaadlaw hiya nga igintago han militar tikang ha iya pamilya tubtub nga namatay.

Nahilista liwat ha duha nga prubinsya an mga kaso han pangastigo, pan-gigipit ngan panhadlok han militar ha mga parag-uma hadton Abril. Ini ngatanan nakabalayan ha paglanat han militar ha hukbo han katawhan.